

Haksolok bá

feto
kmanek
wain
tebes



NOVENA ho MARIA
(Ita reza hodi hake'an Ave Maria)

APREZENTASAUN

Roteiru ida ne'e mai husi hakle'an bíbliku parte dahuluk Ave Maria nian, orasaun ida ne'ebé komún no simples liu, ne'ebé ita iha. Ita reza nia dalabarak, loron-loron! Tan ne'e bele tulun atu reza durante Novena mariana ida.

Iha tradisaun salesiana, Don Bosco transmite mai ita katak obra salesiana hahú loron Imakulada nian, tinan 1841, liu husi enkontru ho Bartolomeu Garelli. Halo tiha diálogu amizade nian no hasai tiha Bartolomeu husi ninia laran susar, Don Bosco reza Ave Maria ida hamutuk ho nia.

Tuir mai bele hetan eskema kona-ba Novena ida ne'e.

Hahú ho fraze ida-idak husi Ave Maria nia parte dahuluk	Tema Bíbliku. Relasaun ho Maria
1. Ave (kumprimentu) Rahun di'ak! (Lk 1,28a)	Alegría mesiánika. Kumpri buat ne'ebé profeta sira haklaken. Saun Lukas konsidera Maria nu'udar Siaun nia oan-feto.
2. Ave Maria, Kecharitomene, Na'i nia atan Lk 1,26b. S. Lukas dehan mai ita katak "feto-raan ne'e, naran Maria". Tuir mai, anju kumprimenta nia nu'udar "feto kmanek wa'in tebes". Nia rasik dehan katak nia mak "Na'i nia atan oan". Naran ne'e signifika saida?	Naran iha Bíblia. Maromak bolu ita tuir ita-nia naran Maromak haraik naran foun ba ema sira.
3. Grasa barak liu Kecharitomene (Lk 1,28a)	Tópiku: GRASA. Maromak halo ita partisipa ba Ninia An rasik. Nia komunika Ninia Espíritu mai ita. Halo ita tama iha Ninia komuñau. Iha Maria, Nia antisipa buat ne'e.
4. Maromak ho ita boot (Lk 1,28b)	Tópiku: Asisténsia-Prezensa Maromak nian. Keta ta'uk, Ha'u hamutuk ho ó. Maria mak Na'i nia atan. Iha Antigo Testamento, Na'i nia atan mak ida ne'ebé simu misaun ida ba povu nia di'ak (Is 41,8-9; Jue 24,29; Ex 14,31).
5. Ita boot di'ak liu ... (Eulogoméne (Lk 1,42))	Tópiku: Bensan iha Bíblia. Katak sá "haraik bensan"? Sémak bele halo?
<i>Ita boot di'ak liu feto hotu-hotu (Lk 1,42)</i> 6. di'ak liu inan sira hotu iha Israel 7. di'ak liu feto hotu ne'ebé sai profeta. 8. Maromak soi liu husi sira ne'ebé la iha valór, liu husi frakeza.	Feto sira iha Bíblia: 6. Israel nia feto sira ne'ebé inan, povu nia inan sira. 7. Feto iha Ézodu. Miriam, Moisés no Araun nia biin 8. Débora, juiz iha Israel, Jael halo povu manán, Judite salva Israel
9. Ita boot nia oan Jezús....	Mistériu Inkarnasaun Maromak nia Oan nian realiza iha Maria no ho Maria. Maria mak Arka Aliansa foun nian, nune'e Isabel kumprimenta nia.

LORON 1 – Ave Maria! HAKSOLOK MARIA!

(KUMPRIMENTU ba MARIA)

1. Introdusaun: Solista

Ita haksolok bá... bolun ksolok nian ne'ebé profeta sira ható'o ba Siaun nia Oan-feto kumpri iha Maria. Haksolok Maria, Yaveh, ó-nia Maromak, hamutuk ho ó. Haksolok tanba Maromak nia promesa ba ninia povu sei haburas iha ó-nia knotak.

2. Aklamasaun ka knananuk: Haksolok Siaun nia Oan-feto.

3. Introdusaun ba Maromak nia Liafuan

Jerusalén, Siaun nia Oan-feto, lori promesa salvasaun nian. Nu'udar espresaun teolójika, "Siaun nia Oan-feto", iha Sagrada Eskritura signifika Israel ideál no fiél, parte povu Maromak nian ne'ebé loos teb-tebes. Gabriel konvida Maria ba ksolok no alegría tanba, iha Nia, promesa furak ne'e sei sai realidade. Ninia knotak sei nakfilak ba templu foun. Maria reprezenta povu Israel tomak ne'ebé purifika an liuhusi esperiénsia rai fuik maran no eziliu, no sai liman rohan salavasaun nian. Maria mak Israel nia aifunan.

4. Proklamasaun

Husi Evanjellu s. Lukas nian:

"Liu tiha fulan neen, Maromak haruka anju Gabriel ba knua ida iha Galileia, naran Nazare, ba feto virjen ida, mane ida naran José, husi David nia uma-kain; feto virjen ne'e naran Maria. Tama tiha iha feto virjen ne'e nia uma, anju dehan: "Rahun di'ak, feto kmanek wa'in tebes! Na'i ho ita!". (Lk 1,26-28)

Husi profeta Sofonías.

"Hakilar ho laran haksolok ba, Sião nia Oan-feto! Israel haksolok ba! Haksolok nafatin no laran kmaan ho fuan tomak, Jerusalem nia Oan-feto!" (Sofonías 3, 14)

5. Silénsiu-Símbolu husik tempu silénsiu nian atu replete (se bele uza projetór, hatudu slide ho liafuan sira)

6. Orasaun litánika

Haksolok Maria no fó ksolok mai ami!

Haksolok Maria,
Tanba loron ida ó rona liafuan hirak ne'e ne'ebé troka ó-nia istória no ami nian.

Haksolok Maria no fó ksolok mai ami!

Haksolok Maria,
Tanba ó-nia moris mak Moris ba humanidade tomak.

Haksolok Maria no fó ksolok mai ami!

Haksolok Maria,
No fó ksolok mai ami atu ami bele komúnika ksolok wain tanba, hanesan ó, Trindade horik iha ami.

Haksolok Maria no fó ksolok mai ami.

Amén

7. Reflesaun badak

Konvite atu moris iha ksolok halo buras kedas ksolok.

Ksolok la'ós de'it prezente ida ka dispozisaun naturál ida ne'ebé ita hetan se iha moris iha simplisidade no objetividade.

Santidade salesiana mak haksolok nafatin, no atitude ne'e loron-loron nian, husu ami ita atu moris ho fuan paskál.

Madre Mazzarello tau simplisidade fuan nian nu'udar kondisaun atu bele moris iha ksolok: "Atu haksolok nafatin ita presiza la'o ba oin ho simplisidade, la buka ksolok husi nein kriatura sira, nein husi sasán mundu ne'e nian." (MM Surat 24). "Aten-barani no iha ksolok boot nafatin tanba ida ne'e mak sinál fuan ida ne'ebé hadomi liu Maromak." (MM Surat 60)

Nia dehan mai ita katak ksolok mak pontu importante liu atu ita hala'o espiritualidade loos nian ne'ebé hetan nia hun iha laran metin iha Maromak nia domin "...haksolok nafatin no halo ha'u-nia irmán doben sira haksolok. Na'i hadomi tebes imi ..." (MM Surat 27).

Ho Orasaun Ave Maria nian, ita entrega ba Maria Virjen Família Salesiana tomak, atu ita bele moris loron-loron santidade ida ne'ebé haksolok: **Ave Maria**

8. **Orasaun atu taka:** Maromak, moris no ksolok nia Na'i, Ita haraik mai ami, iha Maria, motivu ida atu haksolok, ami hakarak entrega ba Ita foin-sa'e sira hotu, liuliu sira ne'ebé laran susar, sira ne'ebé lori todan tan terus, servisu, futuru la klaru, atu sira bele deskobre, liuhusi ami-nia prezensa salesiana, Ita nia Inan nia oin maternu ne'ebé fô aten-barani, fô sentidu no esperansa ba sira-nia moris.

9. **Empeñu:** Hala'o buat ne'ebé ki'ik iha ita-nia moris loron-loron nian ho ksolok.

LORON 2 – AVE Maria! Feto ne'ebé Maromak bolu ho ninia naran

1. Introdusaun:

Ita agradese Na'i tanba Nia haraik Maria mai ami.

Promesa ne'ebé Maromak halo ba ninia povu sai realidade iha feto-raan ida. Anju Gabriel kumprimenta nia hodi bolu nia ho naran foun ida: Haksolok bá, "Feto kmanek wa'in"!

Iha istória salvasaun nian, Maromak bolu ema ida-idak ho ninia naran rasik, hodi hato'o ba nia Ninia dezeńu domin nian. Nune'e ba Abraun, Moisés, Samuel... nune'e mós ba Maria.

2. **G:** Ho anju nia liafuan sira, ita kumprimenta Maria. **Hananu Ave Maria**

3. Introdusaun ba Maromak nia Liafuan:

Iha kultura bíblika ema nia naran mak buat ruma lulik: espresa ema nia personalidade no sai sinál kona-ba ninia dignidade; nia mak rohan la'ek no importante liu tanba inserta ema ida ne'e iha ninia povu nia istória.

Maria nia naran mosu iha lista Jezús nia bei ala sira nian (Mt 1,16) no Lukas mós dehan katak feto virjen nia naran mak Maria. Naran Maria mak komún iha fatin no tempu ida ne'ebá. Naran ida ne'e nia signifikadu ladún klaru: bele signifika "ne'ebé Maromak hadomi", "fitun tasi nian", "ida ne'ebé haroman", "fafurak"...

Maibé, iha loron Anunsiasaun nian, anju kumprimenta nia ho naran ne'ebé, to'o momentu ida ne'ebá, Maromak de'it hatene. Anju dehan: "Kecharitomene", katak "nakonu ho grasa, grasa barak liu" no Maromak entrega ba nia misaun atu sai inan ba Jezús, Na'i nia Oan Mane mesak.

Maria, ho ninia disponibilidade ba anju nia liafuan sira, hatán hodi dehan kona-ba ninia an rasik "Na'i nia atan". Iha Bíblia, atan mak ema ne'ebé Maromak bele konfia nia planu sira atu realiza. Hilin ida ne'e ezije relasaun konfiansa nian no domin ba malu.

Profeta Isaías tulun ita atu komprende katak Maromak bolu Maria no ita ida-idak ho domin boot.

4. Lia husi profeta Isaías 43,1; 49,1

1: “Keta ta’uk basá ha’u soi tiha ó; ha’u bolu ó ho ó nia naran; ó ha’u nian”.

2: “Rai ki’ik sira, rona ha’u bá, fô atensaun, povu dook sira. Na’i bolu ha’u bainhira ha’u sei iha knotak laran, molok ha’u moris, nia temi ona ha’u-nia naran”.

5. Reflesaun:

Momentu silénsiu nian atu interioriza Maromak nia Liafuan. (*se hakarak tau musika, maibé neineik liu*)

6. Salmu 138,13-18

G: Ho salmu 138, ita hahí Na’i ba buat kmanek ne’ebé Nia halo iha ita ida-idak. (*reza ho koru 2 ka hili refraun ida no solista lee kuadra sira*)

Ó halo tiha ha’u-nia isin-lolon nia laran

no hakiak tiha ha’u iha ha’u-nia inan nia knotak laran.

Ha’u fô agradese ba Ita tan buat mesak furak Ita halo

buat hotu-hotu ne’ebé Ita halo boot tebes.

Bainhira ha’u-nia ruin mosu daudaun,

no ha’u, subar-subar, buras hela,

hetan ona klalatak ida iha rai okos kle’an liu,

la iha buat ne’e ida de’it ne’ebé Ita la hatene ona.

Ita-nia futar matan haree ona ha’u iha knotak laran.

Buat ne’e hotu hakerek hela iha ó-nia livru.

Ha’u-nia loron sira hotu taka tiha ona

molok sira ida de’it bele mosu.

Maromak, Ita-nia hanoin sira ema ladún bele hatene!

Mós la bele hatene sira hirak!

Ha’u hakarak sura sira karik, sira barak liu rai-henek;

no, ha’u bele to’o iha rohan karik, ha’u sei hela ho Ita nafatin.

7. Reflesaun badak

Husi hori uluk kedas Maromak hanoin ba ita ida-idak; Ninia projetu domin nian haraik mai ita naran ida, ne’ebé, hodi moris, ita sei deskobre neineik. Hanesan hakerek iha Apocalypse 2,17: “Ha’u sei fô fatuk mutin ne’ebé hakerek tiha naran foun ida iha nia, ne’ebé ema ne’ebé simu, nia de’it, mak hatene.”

Iha momentu ruma, ema ida ka akontesimentu ida revela mai ita naran no husi momentu ida ne’ebá ita-nia moris sei hetan signifikadu kle’an liu: ida ne’e mak ita-nia naran loos.

Ita rona istória ida kona-ba feto ida ne’ebé deskobre ninia naran loos no nia moris nia signifikadu liu husi diálogu ho Amu-Bispu Fulton Sheen, ne’ebé Bispu rasik haktuir...

“Durante viajen ida atu ba New York, (Bispu Fulton Sheen, pregadór famouzu iha TV internasionál) aeromosa bonita ida oferese Sprite ida mai ha’u. Mana bonita hanesan ne’e, ha’u seidaok haree. Ha’u hateke didi’ak ba nia, hafoin ha’u dehan: “Mana, ó mak feto bonita liu ne’ebé ha’u hasoru. Ó hanoin oinsá agradese Na’i?” Nia hateke mai ha’u, hamnasa midar, hafoin ba serbí ema seluk iha aviaun. Liutiha tempu ruma, nia hakbesik fali ha’u no husu: “Amu, oinsá ha’u bele agradese Na’i?” Iha momentu ida ne’ebá, ha’u foin lee kona-ba Bispu fransés ida, misionáriu, mons. Cassaigne, ne’ebé dedika ninia moris tomak ba moras lepra sira iha Linh, Vietnam. Ideia dahuluk ne’ebé mosu no ha’u hato’o ba nia: “Tansá ó la dedika ó-nia moris ba moras lepra sira?” Molok hatán, nia oin hatudu katak nia hakribiit buat ne’ebé ha’u hato’o ba nia, no nia hadook an kedas husi ha’u.

Depoizde enkontru ida-ne’e, ha’u la haree fali nia. Liutiha fulan ruma, ha’u simu surat ida husi Linh, iha ne’ebé hakerek: “Amu-Bispu doben, ha’u la hatene se Amu sei hanoin hetan ha’u. Ha’u mak aeromosa ne’ebé ita hasoru iha 1973. Bainhira ha’u husu oinsá bele agradese Maromak tanba ha’u bonita, ita sujere mai ha’u atu serbí moras lepra sira iha Linh. Ha’u hanoin ho sériu ba proposta ida-ne’e no ha’u hakotu atu saran ha’u-nia

moris ba sira. Ha'u to'o iha ne'e fulan ruma liubá no ha'u sente damen no ksolok boot atu serbí sira. Ha'u agradece ba ita-nia konsellu. Katy."

8. Empeñu G:- Hodi hanoin fali ba ita-nia istória pesoál, ita agradece ba momentu significativu liu iha ita-nia moris no koko atu deskobre naran foun no misaun foun ne'ebé Maromak entrega mai ita iha momentu ida ne'ebá (*momentu ruma silénsiu nian*).

Ita ida-idak husu ba Na'i-Feto atu tulun ita realiza Maromak nia Projetu ba ita-nia moris.

(*se halo Novena ho grupu ki'ik-oan, bele prepara fatuk mutin ruma besik altár no ema ida-idak ba foti ida no ho spidol hakerek naran foun ida ne'e*)

Kantu

9. Orasaun final

Na'i Maromak, ho Anju nia liafuan Ita hakarak katak Ita-nia Liafuan halo an ba ema iha Maria nia knotak. Haraik ba Ita-nia povu, ne'ebé harohan Maria nu'udar Maromak nia Inan loos, atu goza nafatin nia rohan da'et iha Ita Boot nia Futar Oin. Ami husu ne'e tan Jezús Kristu nia naran. Amen.

LORON 3 – Maria, feto kmanek wa'in

1. Introdusaun

G: Irmán no belun doben sira: loron ida ne'e ita simu konvite atu kontempla Maria, feto kmanek wa'in, nakonu ho Maromak, nabilan ho roman no simu bensen wa'in.

Hotu: Maria, ami kontempla ita!

G: Ita prepara ita-nia laran atu simu Liafuan ida ne'ebé Maria uluk rona no troka ninia moris.

Hotu: Maria, hanorin ami atu rona Maromak nia Liafuan!

(Silénsiu)

2. Kantu

3. Introdusaun ba Maromak nia Liafuan (Lk 1, 26 – 38)

Ita sei rona fali Evanjellu Anunsiasaun nian.

Ohin ita sei fó atensaun partikular ba espresaun "feto kmanek wa'in". Liafuan ida-idak mak lia-menon ida ba ida ne'ebé ko'alia no ida ne'ebé rona. Frazee ne'ebé Anju Gabriel hato'o ba Maria, "nakonu ho grasa/ grasa barak liu" lori mensajen fidelidade nian ne'ebé Maromak hato'o ba Maria. Maria simu liafuan hirak ne'e no ninia resposta la para de'it iha momentu Anunsiasaun, maibé nia sei kontinua hatán "Sim" iha ninia peregrinasaun fiar nian.

Kumprimentu ida ne'e, "feto kmanek wa'in", lori mós mensajen ida mai ita.

Husik Espiritu gia ita. Ita loke ita-nia fuan atu rona no simu Maromak nia Liafuan...

4. Proklamasan

Lk 1, 26 – 38 (bele halo ho forma dialogada: narradór, anju, Maria)

5. Reflesaun badak

Ohin ita simu konvite atu fó atensaun ba fraze "feto kmanek wa'in". Anju tama iha ne'ebé Maria hela no kumprimenta nia ho liafuan oin seluk: "Haksolok bá, feto kmanek wa'in tebes" (Lk 1, 28).

Ema tradúz liafuan grega “kecharitômene” ho “feto kmanek wa’in”. Ida ne’e mak verbu “fó onra” nia pasivu, katak simu onra. Bíblia uza liafuan ida ne’e iha ne’e de’it no hanesan fó ba Maria naran foun ida: simu grasa, onra husi Maromak ho modu partikulár.

Surat ba Éfeso sira (1,6) iha espresaun ida ne’ebé besik verbu ida ne’e: “Ida ne’e ba hahí no glória nia grasa nian, ne’ebé Nia haraik mai ita iha Ninia Oan doben” no ko’alia kona-ba transformasaun iha ema ne’ebé Maromak kona ho Ninia grasa.

Naran foun ida ne’e, “feto kmanek wa’in”, iha kultura Ebreu sira nian, prezisa ema nia transformasaun. Revela ba Maria nia naran foun, halo nia sai konxiente katak nia simu grasa partikulár ida husi Maromak.

Lukas subliña Maromak nia laran di’ak, hodi la temi efeitu ne’ebé mosu bainhira nakonu ho grasa. Maria mak instrumentu ne’ebé Maromak hakonu ho ninia grasa no prezente sira. Ida ne’e antisipa Maromak nia salvasaun iha Ninia Oan, Ida ne’ebé Maria simu iha ninia knotak.

Liu tiha sékulu ruma, povu sarani nia fiar halo defini “nakonu ho grasa / kmanek wa’in” nu’udar Imakulada husi momentu ne’ebé nia inan kous nia, nune’e, con el correr de haklaken katak Maromak prepara Maria atu sai Nia Oan nia inan, husi uluk kedas.

Grasa mak Maromak nia komúnikasaun ho ninia kriatura. Grasa mak manifestasaun divina, permanente ne’ebé la bele komprende kona-ba nia ser Ida no Tolu, Kriadór no Na’i, ne’ebé sai dom ba humanidade.

Nune’e, grasa mak Maromak iha ita, iha ha’u, iha ita ida-idak. Grasa mak “tama iha Maromak” ba ita-nia komúnidade sira, ba ita-nia família sira, ba Maromak nia povu no humanidade tomak. Grasa mak unidade nia don iha Espíritu Santu.

6. Apresentasaun PPT ka uza símbolu de’it (vazu ki’ik mamuk, vazu ki’ik nakonu ho aifunan)

7. Silénsiu

Se ema ladún barak bele dehan fraze ida ne’ebé símbolu sujere.

8. Orasaun finál

Na’i, ami-nia Maromak, Ita bolu ami ho ami-nia naran, hakonu ami ho Ita-nia grasa no akompaña ami iha ami-nia misaun edukativa. Hanesan Maria, ami bele simu Ita-nia grasa no fahe ho ema ne’ebé hasoru ami, liuliu foin-sa’e sira, hodi la’o hamutuk iha dalan santidade nian.

Hotu: Amen.

9. Kantu finál

10. Empeñu

Iha momentu silénsiu nian, ita husu atitude haraik no disponibilidade ne’ebé sei tulun ita atu hala’o ita-nia servisu iha família no iha komúnidade.

Loron 4 – Ave Maria. Na’i ho ita! Keta ta’uk.

Iha fraze litúrjika “Na’i horik ho imi” amlulik no assembleia esprime fiar katak Na’i mak iha sira leet. Ita hala’o momentu ida ne’e ho konxiénsia tomak.

1. G: Na’i horik ho imi

2. Kantu:

3. Introdusaun

Iha istória salvasaun nian, Maromak nia promesa, ne’ebé fó konsolasaun no kbiit, repete beibeik: “Ha’u hamutuk ho ó, keta ta’uk!”. Liafuan hirak ne’e hatu’o ba sira ne’ebé Maromak hili no bolu atu hala’o misaun

ida no asegura ba sira ninia asisténsia no tulun. Ita bele hanoin hetan momentu ruma iha Isaac nia moris (Gn 26,3), iha Jacob (Gn 28,15), iha Moisés (Ex 3,12), iha Gedeón (Gdc 6,16), iha Jeremías (1,8), no barak tan...

Maromak nia Liafuan: “Ha’u hamutuk ho ó”, akompaña la’ós ema balun, maibé, ba tinan barak, sai esperiénsia Povu ne’ebé Maromak hili. Maromak la’o hamutuk ho Ninia Povu nafatin (Is 41,13-14); iha momentu sira mós ne’ebé povu hadook an husi Nia...

Entre sira ne’ebé Maromak bolu atu kolabora iha knaar salvasaun nian, Maria iha fatin importante liu. Nia kumpri didi’ak uniaun entre kriatura no ninia Maromak. Hanesan Anju dehan ba Maria: “ó hamutuk ho Na’i nafatin; ó mak metin ba nia liu kriatura hotu”. Maria nia esperiénsia la’ós momentu grasa nian ne’ebé neineik lakon, maibé uniaun nian ne’ebé sai kle’an liu ba daudaun.

Liafuan: “Ha’u horik”, hako’ak tempu hotu: pasadu, presente no futuro: “Ha’u mak Alfa no Omega, Na’i Maromak dehan. Ida ne’ebé iha ohin, uluk no atu mai, Maromak kbiit wa’in” (Ap 1,8).

Fiar kona-ba Maromak nia prezensa permanente, sai kbiit wa’in no konsolasaun ba ema ne’ebé Na’i hili. Ita bele komprende hodi rona pasajen ne’ebé tuir mai, husi livru Daniel nian.

4. Proklamasau. Leitura husi profeta Daniel:

Anju dehan mai ha’u: “Daniel, ema ne’ebé Maromak hadomi, komprende ba lia-menon ne’ebé ha’u sei fó sai ba ó. Hamriik bá, basá Maromak haruka ha’u ba ó.” Rona tiha, ha’u hamriik nakdedar hela. Nia kontinua: “Daniel, keta ta’uk, basá hahú loron uluk ne’ebé ó hahú hanoin atu komprende no haraik an iha Maromak futar oin, Maromak rona ó-nia liafuan sira, no tan ne’e mak ha’u mai... Nia dehan tan mai ha’u: “Keta ta’uk, ema ne’ebé Maromak hadomi. Hakmatek no laran metin bá.” (Dan 10, 11-12a. 19).

5. Silénsiu

(Durante silénsiu ida-idak bele husu ba ninia an: “*Ha’u buka ha’u-nia kbiit no konsolasaun iha ne’ebé ka iha saida?*”)

6. Kantu (*ne’ebé espresa komuñau ho Maromak*)

Hodi kaer liman, atu nia prezensa iha ita-nia moris no katak ita hakbesik maluk sira, ita reza Ave Maria hamutuk ho Na’i-Feto: Ave Maria...

7. Reflesaun badak

- Bainhira sei ki’ik, Don Bosco halo esperiénsia nu’udar orfaun, la iha aman ida (*no nia prezisa aman ida besik nia*), maibé mós nia iha nia inan nia prezensa forte, ne’ebé tulun nia atu hatene Maria nia prezensa. Nia mak akompaña durante nia moris tomak (*mehi tinan 9 nian*). Don Bosco rasik sei sai prezensa belun no aman/inan nian iha foin-sa’e sira leet hodi komúnika Maromak nia domin.
- Don Bosco la uza liafuan “Na’i hamutuk ho ó” ho foin-sa’e sira, maibé nia dehan “*Maromak haree ó*”, no hanorin ba sira atu moris iha Maromak nia prezensa domin nian.
- Eukaristia, hun konsolasaun no kbiit nian, mak momentu forte liu iha ne’ebé Maromak hatudu ninia prezensa iha ita-nia moris. Eukaristia realiza kompletamente Na’i nia prezensa: “*Ha’u sei nafatin hamutuk ho imi no ba imi*”.
- Eukaristia tulun ita atu nakfilak an no sai prezensa domin nian iha foin-sa’e sira leet, hodi fó aten-barani ba sira no akompaña sira iha sira-nia moris.



8. Orasaun finál.

Aman Maromak, ami agradese Ita ba Ita-nia prezensa, don boot liu no folin-boot. Tulun ami atu hetan konsolasaun no kbiit ba ami-nia moris no ami-nia misaun husi komuñan loron-loron nian. Ho Maria nia tulun, halo ami biban atu lori foin-sa'e sira ba hun ida ne'e. Ami husu ne'e hodi Na'i Jezús Kristu nia naran. Amen

Kantu final

- 10. Empeñu:** hanoin hetan Maromak nia prezensa liuhusi vizita ba Eukaristia no espresa ho nia prezensa besik irmán no foin-sa'e sira ho hahalok ki'ik domin nian.

Loron 5 – Ave Maria , ita boot di'ak liu! (Bensan)



1. Introdusaun

Iha istória salvasaun nian Maromak hatudu nia an nu'udar Maromak ne'ebé fó bensan: ba rai no ninia aifuan, ba ema no nia oan sira, ba Ninia povu iha aliansa. Iha Jezús, Maromak nia bensan to'o mai ita no halo ita biban atu fó bensan. Hodi sente Maromak nia domin mai ita, ita bele hamutuk ho **Maria, di'ak liu fetu-hotu**, hahí Na'i, selebra ninia kmanek no nakfilak ita-nia moris ba bensan ida.

2. G: Rahun di'ak ba Maromak, Na'i Jezús Kristu nia Aman. Husi lalehan tutun, hodi Kristu, Maromak haraik bensan oinoin mai ita! (Ef 1,3).

Hotu: Rahun di'ak ba Nia, tinan ba tinan nafatin. Amen!

3. Kantu:

4. Introdusaun ba Maromak nia Liafuan.

Maromak, ne'ebé haraik buat oinoin, fó bensan wa'in ba povu aliansa nian, maibé mós husu ninia fidelidade. Nia promete ba Abraun: "Ha'u sei halo ó sai povu boot ida, Ha'u sei fó naran boot ida ba ó, no ó sei sai beematan bensan sira nian ida." (Gn. 12,2).

Ho Moisés, Maromak sai povu nia Na'i no haraik bensan hotu ba nia, se sei rona Ninia lian no kumpri Ninia ukun-fuan. Iha Antigo Testamento bensan ida ne'e liu husi sékulu hotu no to'o Maria, ne'ebé, hanesan Abraun, fiar no hatán "Sim"; nune'e, liuhusi Maria, promessa bele sai kompletu.

5. Proklamasaun

- **Primeira leitura husi Deuteronomio 28,1-8**

"Ó rona karik Na'i, ó-nia Maromak, nia liafuan, hodi buka atu kumpre ninia ukun-fuan sira hotu, ne'ebé ohin ha'u hato'o ba ó, Na'i, ó-nia Maromak sei halo ó sai boot liu fali povo sira hotu iha rai.

Bensa sira-ne'e hotu sei tun ba ó hodi hela ho ó, bainhira ó rona Na'i nia lian. Ó sei hetan bensan iha sidade no mós iha knua. Rahun di'ak ba ó-nia knotak nia fuan, ó-nia rai nia fuan, ó-nia balada sira nia fuan, karau-oan sira no bibi-oan sira. Rahun di'ak ba ó-nia raga no ó-nia fatin halo paun. Ó sei hetan bensan bainhira ó fila ba uma, no bensan bainhira ó sai hosi uma. Funubaluk sira ne'ebé hamrik hasoru ó, Na'i sei halakon iha ó-nia oin; sira mai hasoru ó liuhusi dalan ida no sira sei halai hosi ó ba liuhusi dalan hitu. Na'i sei haruka rahun di'ak hela metin iha ó, iha ó-nia armazen no iha buat hotu ne'ebé ó halo, no nia sei fó bensan ba ó iha rai ne'ebé Na'i ó nia Maromak haraik tiha ba ó".

- **Hatán ho refraun:** *Bless the Lord my soul....*
- **Evanjellu tuir S. Lukas 1,39-42 (Maria vizita Isabel)**

6. Reflesaun.

Ohin ita kontempla Maria, feto ne'ebé Isabel dehan "rahun di'ak / bendita". Iha Bíblia, katak sa "fó bengan?", Se mak fó bengan? Sé mak simu bengan? Sé mak bele fó?

Liafuan "bengan" iha Israel nia lian, la'ós liafuan litúrjiku, maibé kumprimentu ida, parabéns ida ne'ebé mosu espontánea bainhira iha moris loron-loron nian halo esperiénsia kona-ba Maromak nia asaun. Nune'e, liafuan ida ne'e espresa rekoñesimentu, admirasaun ba buat kmanek ne'ebé Maromak halo no ita experimanta iha moris loron-loron nian. Nia hun mak liafuan hebreo *Barák*, ne'ebé refere ba abundánsia, katak "bainhira Maromak fó bengan, moris sei buras no multiplika".

Loloos, Ida ne'ebé bele fó bengan mak Maromak de'it no ema rekoñese de'it buat ne'e. hodi fó bengan ba Maromak, la'ós de'it ita hahí Nia, maibé ita husu ba Nia atu hakbesik ita no haraik ninia bengan. Tan bengan ida ne'e, entre ita no Nia hari'i relasaun oan nian, tan ne'e ita bele fó bengan, katak rekoñese katak husi Nia de'it moris bele hahú.

Nune'e ita bele komprende Isabel nia liafuan sira ba Maria: "*Isabel hahú ko'alia, dehan: "Ita boot di'ak liu feto hot-hotu! Ita boot nia oan di'ak liu! ... Rahun di'ak ba ida ne'ebé fiar"* (Lk 1,42.45).

"Isabel selebra Maria nia maternidade nu'udar sinál aas liu kona-ba Maromak nia bengan, katak Ninia prezensa ativa iha ita leet no ita-nia istória. Maromak nia bengan mosu liuliu iha fekundidade, iha moris; iha Maria nia knotak iha Ida ne'ebé sei dehan "Ha'u mak moris", nune'e nia halakon mate" (G.Ravasi).

Tuir bengan, iha rahun di'ak ida, tanba Maria, hanesan Abraun, mak ida ne'ebé fiar: nia rahun di'ak la'ós de'it tanba nia kous Kristu, maibé tanba "rona Maromak futar lia hodi halo tuir nia!" (Lk 11,27-28).

7. Tempu atu fahe

Se halo Novena nu'udar komúnidade, ka ho grupu ki'ik, bele fahe esperiénsia, reflesaun ka orasaun kona-ba aspetu ida ne'e iha ha'u-nia moris no komúnidade ninian. Ho Naroman Maromak Futar Lia.

Ba intervensaun ida-idak sei hatán ho refraun: "*Ha'u sei hahí'i....*"

8. Jestu simbóliku no Empeñu:

"Ba buat ida ne'e mak Maromak bolu imi, atu imi mós bele fó bengan no simu Maromak nia bengan" (1 Pt 3,9).

Hodi tula liman ba malu, ita fó bengan ba malu no ita sei haka'as an atu iha atitude bengan nian iha moris loron-loron nian, hasoru ema, situaun ka akontesimentu sira.

9. Orasaun finál

Maromak kbiit wa'in no rohan laek, iha Ita-nia planu domin nian ita inspira ba rahun di'ak Virjen Maria, ne'ebé kous Ita-nia Oan, atu ba vizita santa Isabel, tulun ami atu sai dosil ba Espíritu nia asaun, nune'e ami bele hahí'i Ita-nia naran hamutuk ho Maria. Ami husu ne'e hodi Na'i Jezús Kristu nia naran. Amen.

Se amlulik ida prezide assembleia, nia bele lolo liman no dehan: "Na'i haraik bensa ba imi no bali imi bá. Na'i halo nia oin nabilan ba imi no sai laran diak ba imi bá. Na'i hatudu nia oin ba imi no lori dame ba imi."". (Num 6, 24-26).

Kantu finál

LORON 6 – Di'ak liu feto hotu-hotu, Israel nia inan sira

1. Introdusaun (Solista-Asembleia)

S: Ave Maria, ita di'ak liu feto hotu-hotu,
Ita feto ne'ebé kous Jezús, Moris hun,
ita mak atenta ba maluk sira nia presiza

H: *Ita mak rahun di'ak, Maria,
Inan ne'ebé nunka haluha oan ida,
feto ternura nian,
ho fuan prontu atu simu.*

S: Ave Maria, ita di'ak liu feto hotu-hotu,
ne'ebé hatene sai inan laran luak

H: Inan Santa povu Maromak nian,
Iha ita, inan sira hotu istória nian hahi'i ita,
Harohan ba ita-nia oan sira.
Glória ba Padre....

2. **Kantu:** (*"Madre de todos los pobres" ka seluk*)

3. **Introdusaun ba Maromak nia Liafuan**

Maria mak prezente iha Kreda nu'udar Kristu nia Inan, no, iha tempu hanesan, nu'udar Inan ne'ebé Kristu, iha mistériu redensaun nian, entrega iha eskolante ne'ebé Nia hadomi, iha kruz hun. Tan ne'e, Maria simu, ho maternidade foun iha Espíritu, ema hotu hotu iha Kreda. Nune'e, Maria, Kreda nia Inan, sai mós ninia modelu. Santu Paulo VI dehan katak "Kreda hetan, iha Maria, forma loos no autentika liu atu imita Kristu". Maria mak Inan povu foun Maromak nian. Iha istória sira ne'ebé ita bele lee iha Livru Génesis, ita hetan feto sira ne'ebé sai inan ba povu Israel. Iha sira-nia maternidade ita bele hetan lalatak ne'ebé prepara Maria nia figura.

4. **Proklamasau**n (entre leitura sira husi Livru Génesis bele hili se lee hotu ka balun de'it. Iha PPT bele hetan testu)

Sara: Gen 17,15; Agar: Gen 16,3.21,17; Rebeca: Gen 24,10-17;...



5. **Momentu reflesaun nian**

(Se uza PPT bele husi diapositiva ikus ho livru ne'ebé nakloke no konvida ema atu fó sai feto sira nia naran (husi istória pasada ka atuál) ne'ebé hala'o maternidade ida ho signifikadu boot. Ezemplu:

* Mamá Margarita, Don Bosco nia inan. Nia dehan katak iha ninia metodu edukativu nia "koko atu fó ba foin-sa'e sira buat ne'ebé nia inan hanorin ba nia bainhira sei ki'ik.

* Madre Mazzarello, ne'ebé simu bolun atu sai inan/ Madre iha Institutu FMA nian.

* (assembleia bele aumenta)

Ba naran ida-idak, assembleia hatán: AMI AGRADESE ITA Na'i.

6. **Kantu** (Obrigadu Maria... ka seluk tan)

7. Orasaun finál

Aman Santu, hun Domin no Moris nian, ne'ebé, ho Espíritu Santu nia kbiit, halo Ita-nia oan sira partisipa ba Ita-nia maternidade no paternidade iha istória, ami agradese Ita, tanba Ita hatudu Ita-nia oin inan nian, liuhusi inan barak ne'ebé hala'o sira nia moris nu'udar ministeriu maternu. Ami husu atu Maria nia ezemplu bele kontinua gia sira ne'ebé hakarak tuir Ita-nia Oan iha moris loron-loron nian. Amen.

8. Empeñu: hanesan inan sira, haka'as an atu la moris hodi tau ha'u-nia an iha sentru, maibé sai atenta/u ba ema nia presiza, hodi fó tulun ho simplisidade no haraik an.

LORON 7– di'ak liu feto hotu-hotu... Profeta sira ne'ebé lori Maromak nia lia

1. Introdusaun (Solista-Asembleia)

S: Ami kumprimenta ita, Maria, di'ak liu feto hotu-hotu,
Feto loos, ikona ba ema ne'ebé servisu hamutuk ho Maromak

H: *Tulun ami atu lee no interpreta istória,
Ho Maromak nia Liafuan no domin nia lójika.*

S: Ami kumprimenta ita, Maria,
Feto ne'ebé hatene moris iha resiprosidade ho ema seluk.

H: Hateke ba povu hotu iha rai
ne'ebé moris iha odriu no konfliktu
Tulun ami atu hetan fila fali fraternidade ne'ebé
Maromak mehi ba mundu tomak.
Glória ba Padre...



2. **Kantu:** (*“Quando o profeta...” ka seluk*)

3. **Introdusaun ba Maromak nia Liafuan**



Iha AT ita hetan knananuk libertasaun nian husi feto sira ho kompromisu ba sira-nia povu. Sira hananu buat kmanek oinoin ne'ebé Maromak halo ba Ninia povu. Sira mak istória nia koprotagonista sira no portavós rekoñesida, tanba sira rasik tama iha Maromak nia planu salvasaun nian.

Maria inserta iha korente ida ne'e feto sira povu Aliansa nian, ne'ebé, hanesan profeta loos sira, hatene haree istória ho Maromak nia matan. Nune'e Miriam, Moisés no Araun nia biin, ne'ebé hananu: “Na'i mak ha'u-nia kbiit, ha'u-nia beran... (Ex 15,21), Ana, profeta no juiz Samuel nia inan: “Ha'u fuan haksolok iha Maromak” (1Sam 2,1-10), no mós Maria, Jezús nia inan, ho espíritu profétiku, hananu, iha Magnificat, Maromak nia asaun fiél ba kiak sira.

4. **Proklamasau** (Ex 2,4;2,7-9; 15,20-21 y Lucas 1,46-55)

(PPt bele tulun ho testu Exodo nian kona-ba Miriam, Moisés no Araun nia bin. Se la bele projeta, iha PPT bele hetan testu bíbliku atu lee)

5. Momentu reflesaun nian (Se uza PPT, bele husik diapositiva ikus nian ho imagen livru nakloke nian: Magnificat-Rahun-di'ak sira) sei lee testu ne'ebé tuir mai:

Bele haree kedas katak Maria nia Magnificat besik ho Rahun-di'ak sira ne'ebé Lukas apresenta iha ninia Evanjellu: «Rahun di'ak ba imi sira ne'ebé kiak...hamlaha; susar ba imi ne'ebé riku!...» (Lk 6,20-26). Testu rua ne'e ko'alia kona-ba kategoria sosiál, maibé mós, kona-ba atitude laran nian. Maria halo ita komprende katak buat hotu ne'ebé Maromak halo iha AT, hodi halakon ema loko an sira no defende kiak no ema haraik an sira, Nia sei kontinua halo iha Aliansa foun, liuhusi Jezús nia hahalok sira.

(*husik momentu ruma silénsiu nian*)

6. Intersesaun.

Depoizde intersesaun ida-idak, sei hananu refraun (*“Rahun di'ak...” ka seluk*)

1. *Ksolok ba ema sira ne'ebé kiak iha laran, basá reinu lalehan sira nian*

- Na'i, haraik mai ami fuan kiak ida, hanesan Maria ninian, fuan ne'ebé iha atensaun ba maluk sira nia presiza, liuliu ba foin-sa'e sira.

2. *Ksolok ba sira ne'ebé tanis, basá sira sei hetan kmaan.*

- Na'i, haraik kbiit mai ami, hanesan D. Bosco no M. Mazzarello, atu tau uluk liu foin-sa'e sira no sira-nia di'ak, hafoin preokupa ba ita-nia interese pesoál.

3. *Ksolok ba sira ne'ebé laran maus, basá sira sei simu rai nu'udar liman rohan.*

- Na'i, haraik mai ita hateken pozitivu no di'ak ida, atu bele haree pontu ne'ebé lori ba di'ak, iha foin-sa'e ida-idak

4. *Ksolok ba sira ne'ebé hamlaha no hamrook ba justisa, basá sira sei bosu.*

- Na'i, tulun ami atu transmite prezente sira ne'ebé ami simu husi Ita-nia domin

5. *Ksolok ba sira ne'ebé laran sadi'a, basá sira sei hetan laran sadi'a.*

- Na'i, haraik mai ami grasa atu hatene halo ain-hakat dahuluk atu bele perdua no simu ema ne'ebé besik ami.

6. *Ksolok ba sira ne'ebé laran moos, basá sira sei haree Maromak*

- Na'i, haraik mai ami fuan ida ne'ebé moos, livre no hatene hadomi, simu no komprende nafatin.

7. *Ksolok ba sira ne'ebé buka dame, basá ema sei bolu sira Maromak oan.*

- Na'i, tulun ami atu “manán aat ho di'ak”, hodi manan vingansa ka odiu.

8. *Ksolok ba sira ne'ebé ema duni, fó terus, tan buka justisa, basá reinu lalehan sira nian.*

- Na'i, halo ami sai aten-barani atu fó sasin kona-ba Ita-nia domin iha momentu hotu moris nian.

Ita remata ita-nia intersesaun sira hodi reza Ave Maria hamutuk.

7. Orasaun finál

Aman Santu, ami agradese Ita, tanba Ita kontinua haruka Ita-nia Espíritu iha ami-nia fuan atu bele hala'o profésia mundu foun nian, ne'ebé hahú husi ema ida-idak no habelar ba mundu tomak. Hanesan Maria, ami hakarak sai kolaboradór/a iha Ita-nia planu salvasaun nian no moris ho radikalidade Rahun-di'ak sira ne'ebé Ita-nia Oan haklaken. Ami husu ne'e hodi Na'i Jezús Kristu ne'ebé moris ho Ita, tinan ba tinan nafatin. Amen.

8. Kantu finál: Magnificat.

9. **Empeñu:** Maria bele hananu Magnificat tanba nia kontempla realidade ho matan Esperansa nian. Istória nia kontemplasaun ida ne'e, halo nia evidénsia sinál moris nian, ne'ebé haroman terus humanidade nian. Ita aprende husi nia atu hananu ita-nia Magnificat.

Loron 8 – Ave Maria. Dia'ak liu feto hotu-hotu! Liuhusi buat ne'ebé fraku, Maromak mak manán.

1. Introdusaun

G – Grasa, laran sadi'a no damen husi Aman Maromak no ita-nia Na'i Jezús kristu horik ho ita.

A – Amen!

2. Kantu

3. Introdusaun ba Maromak nia Liafuan

Iha istória salvasaun nian, Maromak opera nafatin liuhusi instrumentu sira, ne'ebé, husi parte umana, parese ladún adekuadu, maibé loloos hatudu Maromak nia ser no ninia estilu servisu nian.

Entre instrumentu sira ne'e, feto sira mak barak. Liuhusi sira nia frakeza kbiit laek, Maromak sai maksoin ba kiak sira no defende fraku sira. Nune'e, Maromak manán iha ema fraku sira kbiit laek no ema fraku sira manán ho Na'i nia estratejia sira. Judit, Debora, Ester no feto seluk tan la halo tuir sira-nia inisiativa, maibé ho Maromak nia bolun, sira halo funu hasoru funubaluk sira ne'ebé lori povu Israel dook husi fiar moos. Fiar sarani haree iha feto sira antispasaun ilas Kreda nian no Maria ninian.

4. Proklamasau

Halo intronizasaun ba Maromak nia Liafuan, Ema lori Bíblia no akompaña ho na'in rua ne'ebé lori lilin no tau Bíblia iha fatin ne'ebé prepara ona. Bele hili knananuk ida durante prosisaun.

Husi Livru juiz sira nian (4, 4 – 10)

"Iha tempu ne'ebá Israel nia juiz mak profeta Debora, Lapidot nia feen. Nia tribunal hela iha ai palmeira Debora nian, iha Rama no Betel nia le'et iha Efraim nia foho sira. Ema Israel sira ba hasoru nia kona ba sira nia problema.

Debora haruka bolu Barac, Abinoem nia oan mane ne'ebé horik iha Cedes Neftali nian hodi dehan ba nia: "Na'i, Israel nia Maromak, haruka atu ó ba foho Tabor hodi halibur ema rihun sanulu husi suku Neftali no Zabulon. Maromak sei dada ba ó besik mota Quison, Jabin nia esersitu nia chefe, Sisara, ho nia kuda kareta no soldadu barak hodi saran sira ba ó." Barac hatan: "Ita boot mai karik ho ha'u, ha'u sei ba. Ita la ba karik, ha'u la ba." Debora hatán: "Di'ak. Ha'u sei ba ho ó. Maibé espedisaun ne'ebé ó sei hala'o sei la sai ó nian, basá Maromak sei saran Sisara ba feto ida nia liman." Debora ba ho Barac to'o Cedes. Barac halibur Zabulon no Neftali iha Cedes: ema rihun sanulu; no Debora la'o hamutuk ho sira.

(Pasajen seluk ne'ebé bele hili: Juiz 4,17^a-18; Judit 11,21; 15,8-10)

5. Silénsiu

6. Kantu de Judit (16, 1-2. 13-15)

Ant: Na'i, Ita mak boot, Ita kbiit wa'in, ita manán nafatin

nia hasai ha'u hosi sira nebe duni ha'u.

Hahi ha'u nia Maromak ba ho tambor ki'ik,
hananu ba Na'i ho simbalo.
Halo knananuk foun hahi nian ba Nia
Hawelok no bolu nia naran

Ha'u sei hananu ba ha'u nia Maromak
knananuk foun ida
Na'i, ita boot kmanek no boot liu
ita nia kbiit murak no ema la bele tahan!

Na'i mak Maromak ne'ebé halakon funu.
Iha nia akampamentu iha nia povu leet,

Mundu tomak serbi ita boot ba,

basá ita haruka no sira mosu mai,
no buat hotu iha ona.
Ita boot haruka Ita nia espíritu,
no buat hotu mosu.
Buat ida la bele tahan iita nia lia.

Ita hatudu laran di'ak
ba sira nebe laran metin ba ita.
Glória ba Padre...

Laloran sira sei baku foho hun sira no
fatuk sira sei nabén hanesan lilin.

Ant: Na'i, Ita mak boot, Ita kbiit wa'in, ita manán nafatin.

7. Reflesaun badak

Katesizmu Kreda Katólíka nian dehan katak Maria nia misaun prepara iha aliansa tuan liuhusi feto seluk barak. *Nia nabilan entre Na'i nia ema haraik an no kiak, ne'ebé hein ho konfiansa no simu salvasaun husi Nia. Ho Maria, Siaun nia Oan-feto furak [...] tempu to'o ona no hahú Ekonomia foun.* (LG 55) feto sira-ne'e nia karakteristika mak kualidade ne'ebé Maromak uza iha Antigu Testamentu nia kontestu.

Iha Testamentu Foun Maria nia kualidade sira hatudu espresaun di'ak liu, tanba iha Maromak nia intervensaun direita tuir ekonomia foun salvasaun nian.

Divinu Redentór nia Inan, mak atan haraik an iha kriatura hotu nia leet. Hodi kous Jezús, fó han ba Nia, apresenta ba Aman Maromak iha templu, terus hamutuk ho ninia Oan bainhira mate iha kruz, Maria kolabora ba obra Maksoin nian liuhusi obediénsia, fiar, esperansa no karidade atu hari'i fali vida sobrenaturál iha klamar sira. Tan ne'e nia sai ita-nia Inan tuir orden grasa nian. (LG 61)

Hodi tuir Maria nia ain-hakat, ita mós, feto ka mane, edukadora ka konsagrada, aman ka inan, simu bolun atu tulun foin-sa'e sira nune'e sira bele manán ídolu ne'ebé hadook sira husi Maromak, no simu dezafiu sira hodi sai promotor/a sira moris nian.

8 Ita reza ba Maria, di'ak liu feto hotu-hotu, hodi dehan: **Ave Maria...**

9. Orasaun finál. Na'i, hatudu Ita-nia kbiit no hiit An mai: iha perigu ne'ebé ameasa ami, tan ami-nia salan sira, Ita-nia protesaun liberta ami no Ita-nia tulun soi ami. Ita mak Maromak ne'ebé moris no ukun hamutuk ho Espíritu Santu, tinan ba tinan nafatin. Amen

10 Empeñu: hodi banati tuir Maria, modelu fiar no karidade nian, ita mós, fó atensaun ba Na'i ne'ebé ukun ita-nia moris no ambiente iha ne'ebé ita moris bá, no ita sei sai sensível ba Espíritu atu servisu hamutuk ho Maromak iha ninia planu salvasaun nian. Ita-nia frakeza la bele hapara ita..

Loron 9 – Ave Maria. Ita boot nia Oan Jezús di'ak liu!

1. Introdusaun

G: Ohin ita simu konvite atu medita mistériu boot Maromak nia Oan ne'ebé halo An ba ema iha istória: Jezús, “Oan Di'ak liu” ne'ebé Maria kous.

Ita kumprimenta Trindade Santa hodi **hananu** (*Kantu ida ba Trindade/ Glória ba Na'i...*)

G: “Ne'e mak Maromak nia horik fatin iha ema sira leet. Nia sei halo nia uma iha sira leet; sira sei sai nia povu no Nia sei hela ho sira no sai sira nia Maromak.”
(Ap. 21, 3).



Koru 1: “Moisés la bele tama iha Tabernákulu, tan kalohan hela iha neba hodi taka nia no Na'i nia glória hakonu Horikfatin.” (Ez 40, 35).

Koru 2: “Sira lori Na'i nia Arka hodi tau nia iha nia fatin iha tenda ne'ebé David harii ba nia. Hafoin David hasa'e sakrifisiu sunu no dame nian ba Na'i.”. (2 Sam 6,17).

Solista: Profeta sira nia Liafuan sira ne'ebé haklaken katak Mesias sei hiit An mai, hatudu Maromak nia promesa, atu horik iha povu nia leet.

Koru 1: “Tubun ida sei moris husi Jesse nia hun no aifunan sei moris husi nia abut sira. Iha nia sei hela Na'i nia espíritu” (Is.11, 1-2a).

Koru 2: “Haree bá, loron sira sei to'o mai,” Na'i dehan: “Bainhira ha'u sei foti sanak loos ba David. Nia sei ukun nu'udar liurai ho matenek hodi halo buat ne'ebé loos no justu iha rai. Iha nia loron sira, Judá sei manán no Israel moris hakmatek. No ne'e mak naran ne'ebé ema sei bolu nia, 'Na'i-mak-ita-nia-Maksoin” (Jer. 23, 5-6)

A: “... *Ita boot di'ak liu feto hot-hotu! Ita boot nia oan di'ak liu!*”. (Lc. 1, 42).

2. Introdusaun ba Maromak nia Liafuan

Maromak hola isin ida iha Maria ne'ebé kous Jezús. Nia realiza promesa Antigu Testamentu nian no lori naroman foun ida ba humanidade. Hala'o Aliansa ho ema sira no ho ema ida-idak.

3. Intronizasaun Bíblia nian.

(kantu ida acompaña Bíblia ne'ebé tama ho prosisaun to'o altár hamutuk ho lilin sira).

4. Proklamasau husi Evanjellu João nian: Jn. 1, 9-17.

Naroman loos mai iha raiklaran, naroman ne'ebé leno ema hot hotu. Nia horik nanis iha raiklaran; Nia rasik mak hakiak raiklaran, maibé raiklaran la hatene Nia. Nia mai ba nia emar sira, maibé sira ne'e la simu Nia. Maibé, ba ema sira ne'ebé simu Nia hodi fiar nia naran, Nia haraik kbiit atu sai Maromak nia oan. Ema sira ne'e la mai husi ema nia ran, eh tuir ema nia isin nia hakarak; la'ós husi ema nia hakarak, maibé husi Maromak. Liafuan ne'e halo An ba mane. Nia horik duni ho ita. Ami haree tebes nia glória, glória ne'ebé Nia simu husi Aman, nu'udar Oan Mane mesak, kmanek no loos teb-tebes. João fô sasin kona ba Nia, dehan: “Ema ne'e mak Ida ne'ebé ha'u dehan ona katak Nia ne'ebé tuir ha'u mak uluk tiha ha'u, basá Nia uluk liu ha'u.” Husi nia di'ak nakonu mak ita simu di'ak oi-oin tu-tuir malu. Basá ukunfuan mai husi Moises, maibé grasa no lia-loos mai husi Jezús Kristu.

5. Silénsiu: momentu reflesaun nian

6. Salmu 83:

Ita-nia hela-fatin sira di'ak tebes,
Na'i raiklaran nian!

Ha'u-nia klamar hakarak no hanoin tebetebes
odamatan sira Na'i nia uma nian;
Ha'u-nia fuan no ha'u-nia isin-lolon
hananu ho ksolok ba Maromak moris!

Mós manu sira lalehan nian hetan kakuluk ida,
no andorinha sira knuuk ida, ba sira-nia oan sira,
besik ó-nia altár sira, Na'i raiklaran nian,
ha'u-nia liurai no ha'u-nia Maromak.
Rahun-di'ak ba sira ne'ebé hela iha Ita-nia uma

no hahi'i Ita nafatin.

Rahun-di'ak ba sira ne'ebé hetan
iha Ita sira-nia kbiit
no sira ne'ebé hakarak
la'o rai to'o iha foho Siaun.
Bainhira sira sei hakat liu Foho-leet Tanis nian
sei halo nia sai matak,
ne'ebé udan tinan sei hakonu ho buat di'ak oioin.

Sira la'o ba oin ho laran namanas liután,
to'o iha Siaun, sira hamriik ona

iha Maromak nia futar oin.
Na'i, Maromak raiklaran nian,
rona ha'u-nia harohan bá,
Ita, Jakób nia Maromak, see tilun mai ha'u bá.
Maromak, Ita haree ami-nia kalili bá, hateke
ba ida ne'ebé Ita kose ona ho mina nia oin bá.

Loron ida iha Ita-nia uma nia odamatan sira
folin liu rihun ida; ha'u hakarak hela

iha tama-fatin ha'u-nia Maromak nia uma nian,
liu fali hela iha ema aat sira
nia takabaluk sira nia laran.

Basá Na'i mak loro no mak kalili;
Nia haraik grasa no glória;
Na'i raiklaran nian,
rahun-di'ak ba ema ne'ebé fiar an iha Ita!

7. Reflesaun badak

- *“Liafuan ne'e halo An ba mane”* Iha dalen Gregu iha liafuan ida ne'ebé signifika “sai, moris, ser, mosu”. “Sai”, la hanesan “ser”: Halo An ba mane mak pontu atu to'o husi istória Maromak nian ne'ebé komúnika An ba ema sira. Liafuan rohan laek, Liafuan ne'ebé horik hamutuk ho Maromak no mós Maromak, iha momentu ida hola ema nia isin. Maromak troka estilu komúnikasaun ho ita: Ida ne'ebé uluk kedas iha nanis, hola isin no fahe ita-nia kondisaun umana. Maromak mak domin no ida ne'ebé hadomi fô an tomak, hodi la rai buat ida. Hodi hola isin ida, Maromak nia dom mak kompletu no ba nafatin.
- Iha Maromak nia projetu, Maria mak instrumentu privilejiadu ida, nia mak tabernakulu moris Na'i nian iha ita leet...
- Maria la'ós Inan ba ema ida ne'ebé halo an hanesan Maromak, maibé nia mak Inan ba Ida ne'ebé uluk kedas mak Maromak.
- Maromak la'o hamutuk ho ita. Iha la'o dalan ida ne'e, Maria, feto Aliansa nian, Liafuan nia eskolante, akompaña ita hodi gia iha resposta fiél ba Aliansa ne'ebé Maromak estabesele ho don Bosco no Maria Domingas Mazzarello.
- Maria, mak Don Bosco no Madre Mazzarello sira-nia Mestra; Nia hanorin mai ita atu simu Jezús iha ema ne'ebé ita hasoru, liuliu foin-sa'e sira, no konvida ita atu hola parte ba Maromak nia Projetu salvaun nian, hodi moris fiél ba ita-nia vokasaun rasik.

8. Orasaun finál.

Oh Maromak, liuhusi anju nia anúnsiu Ita hakarak katak Liafuan hola isin iha Maria nia knotak virjinál, haraik ba Ita-nia povu, ne'ebé onra Maria nu'udar Inan loos Maromak nian, atu simu ninia protesaun inan nian nafatin. Ami husu ne'e liuhusi Jezús Kristu, ami Na'i. Amen.

9. Empeñu: Ida-idak foti empeñu atu haklaken Kristu ba maluk sira. Se halo Novena ho grupu ki'ik, durante knananuk, bele halo Bíblia liu husi ema ida-idak, bainhira kaer iha liman, ida-idak hanoin ba ninia empeñu.

Kantu finál: